



Kelkomp.


18827


P



18827










†. 01054 1/2 tr  
PETRVS TYLICKI  
D.G. EPISCOPVS  
CRACOVLEN. 18827. I

Clero Diocesis nostræ Cracouien. Christi  
IESV gratiam & pacem.

 *Vod vranimibus vestris suffragiis, in Synodo proximè per nos coacta, de propagandis salutis humane rebus, muneribusq; & oneribus Ecclesiasticis supportandis sanciuimus; id pralo mandatum presentium literarum edicto promulgamus, vobisq; intimamus. Quod quidem vt ea animorum promptitudine suscipiatis, sicuti ad explendas ordinationes nostras iureiurando adstricti estis, fraternè à vobis requirimus. Adiunximus hisce Constitutionibus Bullam Cœne Domini hoc anno editam, vt eam iuxta Apostolicarum Sanctionum Statutorumq; Prouincialium prescriptum, in Ecclesiis vestris sapius euulgetis. Apponi quoque fecimus rationem Pubis per Scholas Parochialium Ecclesiarum instituenda, quam Synodi placito Professores Acade-*





## P R Æ F A T I O.

*miæ Cracouiæ. conscripserunt; quæ ut in omnibus Scholis obseruetur, Parochi atque omnes alij, quibus præfectura Scholarum incumbit, prospiciant. Porro dum hostes animarum nostrarum ad oppugnationem Ecclesiæ novas artes vibrare conspiciamus, illorū satellitio lumen inprimis proborum morum & viuas virtutum imagines, Deo duce, opponere satagamus; persuasum habentes Hierarchiam Ecclesiasticā tantoperè Canonicis sanctionibus instructam esse, nihil ut aliud supersit, quàm ut placitis SS. Patrum, quæ pro diuersis Conciliis, afflatu Spiritus sancti, rogata ad nos propagarunt, mores nostros accomodemus. Datum Cracouiæ die viii Mensis Maij. Anno Domini M. DC. XII.*



CONSTI-



# CONSTITVTIONES<sup>3</sup> SYNODI DIOECESANÆ CRACOVIENSIS.

## *De disciplina Ecclesiastica retinenda.*



**V**t disciplina Ecclesiastica, quam per Visitationes propagamus retineatur, sancimus vt Conuentus Decanales, bis in anno iuxta iura antiqua & consuetudines, agantur. In quibus Conuentibus, inprimis Decani dispicient, an decretis & ordinationibus in Visitatione præscriptis satisfiat: & si quempiam scandalosum notoriisq; excessibus laborantem Decanus compererit, cum in continenti ad Officiale loci Foraneum remittat, cum informatione super eius excessibus facta. Officialis autem absque procrastinatione contra remissum iudicialiter procedat, processumque iudicarium quamprimum per sententiam definitiuam, intra sex hebdomadas, teneatur determinare. Sin autem Officialis in processu remissior fuerit, ad nos, aut ad Officiale nostrum Generalem, Decanus id referat: Foraneus verò Officialis poenas conniuentiæ aut negligentiae suæ arbitrarias dabit.

## *De Decimis.*

**I**n harendo Constitutioni Prouinciali in Synodo sub Illustriss. Cardinali Maciejouio Archiepiscopo factæ, per Sedemq; Apostolicam confirmatæ, contra eos qui Decimas Ecclesiæ debitas inuadunt, eandem Constitutionem innouamus, decernentes, vt sub poenis Clementinæ Cupientes. de poenis. nemo eos qui decimas non pendunt, absoluat. Cuius  
A 3 quidem



## 4                      *CONSTIT. SYNODI*

quidem Constitutionis & Clementinæ nè quis ignorantiam prætendat, eas proprio suo tenore hic inserimus. Et in primis Constitutio Prouincialis sic se habet.

Prohibet sancta Synodus, sub pœna excommunicationis incurrenda, nè quisquam, etiam Regularium cuiuscunque ordinis; subtrahentes quoscunque, vel impediētes Decimas debitas Ecclesiis, absolvere præsumat, nisi plena restitutione illarum secuta: similiter eos, qui in Concionibus aut vbi libet aliàs proferent aliquid, quo audientes à solutione Decimarum auertant, vel conscientias confitentium sibi, nullum de industria super solutione earundem scrupulum iniicient, declarat pœnas incurrere in Clementina Cupientes. de pœnis. sanctitas. Clementinæ autem hæc est series.

Cupientes eos, quos ad obseruantiam iurium, virtutum præmia non inducunt, tam adiectarum exaggeratione pœnarum, quàm adiciendarum de nouo formidine, à temerariis ausibus refrænare transgressores Constitutionis, quæ Religiosis mendicantibus, domos ad habitandum vel loca quæcunque de nouo recipere, recepta hucusque mutare, vel ea transferre in alios, cuiusuis alienationis titulo, interdicit; Illos etiam Religiosos, qui aliqua, vt audientes à Decimarum Ecclesiis debitarum solutione retrahant, in sermonibus suis vel alibi proferre præsumunt, excommunicationis subiacerent sententiæ decernimus ipso facto. Et quia nisi fiat quod bonum est, à malo abstinere non sufficit; Religiosis omnibus iniungimus sub obtestatione diuini iudicii, & interminatione maledictionis æternæ, vt quotiens populo prædicabunt in prima Dominica, quarta, & vltima Quadragesimæ, & in festis Ascensionis Dominicæ, Pentecostes, Natiuitatis beati Ioannis Baptistæ, Assumptionis, & Natiuitatis Beatissimæ Virginis Mariæ matris Dei, audientes expresse studeant informare, si ab Ecclesiarum Rectoribus vel Vicariis, aut loca tenentibus eorundem requisiti fuerint; nec  
non



non & his quorum confessiones audient, conscientiam facere, quòd decimas soluere non omittant. Quodsi fortè in prædicationibus hoc ipsum supradictis diebus suadere scienter omiserint, per superiores eorum grauer arguantur. Quibus etiam superioribus in virtute sanctæ obedientiæ districtè præcipimus, vt contrà taliter omittentes, statuta pœnalia faciant; secundùm quæ sic acriter puniant transgressores, quòd pœna eorum sit cæteris in exemplum; Constitutione bonæ memoriæ Gregorij Papæ decimi prædecessoris nostri circa hæc edita, in suo nihilominus robore duratura. Qui verò scienter postposuerint, confitentibus conscientiam facere, de soluendis huiusmodi decimis, ab officio prædicationis tamdiu maneant ipso facto suspensi, donec confitentibus ipsis (si hoc ipsum sibi dicendi commodè facultatè habuerint) conscientiam fecerint: exinde excommunicationis incursum sententiam ipso facto, si prædicare præsumpserint, prædicta negligentia (vt præmittitur) non purgata. Ad religiosos tamen Monasteriorum, vel Rectores Ecclesiarum decimas percipientium, nolumus hoc extendi.

Præterea, inhærentes tam iuri communi, quàm declarationibus Illustriss. Cardinalium Sacri Concilij Tridentini interpretum, super Caput vii de Casuum reservatione, Sessionis xiiii eiusdem Concilij, quibus Regulares quoscunque, etiam exemptos, non posse vigore quorumcunque Priuilegiorum, etiam illius quod Mare magnum appellant, absoluere quempiam à Casibus reservatis Episcopo, sæpius responderunt: Casum non pendentium, rapientium, occupantium, & impediendum decimas, census, redditus, iura, siue alia quæcunque emolumenta & obuentiones Ecclesiæ, nobis reservamus; declarantes in facultatibus super absolutione à Casibus nobis reservatis, per nos hætenus concessis, quibuscunque siue Secularibus, siue Regularibus cuiuscunque instituti, Casum hunc nos non comprehendisse, neque intentionis nostræ fuisse, absolutionem ab hoc Casu cuiquam concedere voluisse, aut



se, aut in posterum concedere velle. Ipsos verò Sacerdotes sic absoluentes, Religiosos præsertim, poenas in Clementina Religiosi. de Priuilegiis & excessibus Priuilegiatorum. comprehensas, incurrere declaramus. quam Clementinam propria sua serie hic inferimus.

Religiosi, qui clericis aut laicis Sacramentum Vnctionis extremæ, vel Eucharistiæ ministrare, Matrimonium aue solemnizare, non habita super his Parochialis Presbyteri licentia speciali; aut qui excommunicatos à Canone, præterquàm in casibus à iure expressis, vel per Priuilegia Sedis Apostolicæ concessis iisdem, vel à sententiis per Statuta Prouincialia aut Synodalia promulgatis, seu (vt verbis eorum vtamur) à pœna & culpa absolvere quemquam præsumpserint, excommunicationis incurrant sententiam ipso facto, per Sedem Apostolicam duntaxat absoluendi: quos etiam locorum Ordinarij (postquam de hoc eis constiterit) excommunicatos faciant publicè nuntiari, donec de absolutione ipsorum eis facta fuerit fides, nullo Religiosis eisdem super hoc exemptionis vel alio Priuilegio suffragante. Quibus etiam in virtute sanctæ obedientiæ, & sub interminatione maledictionis æternæ distrietiùs inhihemus, nè in sermonibus suis Ecclesiarum Prælati detrahant: aut etiam retrahant laicos ab Ecclesiarum suarum frequentia vel accessu: seu indulgentias pronuntient indiscretas: nèue cùm cõfectionibus testamentorum intererunt, à restitutionibus debitis, aut legatis matricibus Ecclesiis faciendis, retrahant testatores: nec legata vel debita, aut malè ablata incerta, sibi aut aliis singularibus sui Ordinis fratribus vel Conuentibus, in aliorum præiudicium fieri seu erogari procurent: nec etiam in casibus Sedis Apostolicæ, aut locorum Ordinariis reseruatis, quemquam absolvere: aut personas Ecclesiasticas, præsertim coram Iudicibus delegatis à nobis, suam contra eos iustitiam prosequentes, vexare indebitè, aut ad loca plura, & præsertim multum remota conuenire præsumant. Si qui verò præmissa, vel aliquod



aliquod de præmissis attentare præsumpserint, per duos menses subiaceant pœnis illis, quæ secundum eorum regulam vel statuta, pro grauibz criminibus seu culpis eis consueuerunt imponi: super quibus absque manifesta necessitate cum eis non valeat dispensari. Cæterum Prælati eorum, nisi de his quæ occasione præmissorum excessuum ad eos quoquo modo peruenerint, Ecclesiis aut personis Ecclesiasticis damnificatis vel latis, satisfactionem plenariam exhibuerint intra mensem, postquam super hoc fuerint requisiti, suspensionis sententiam usque ad satisfactionem debitam eo ipso incurrant, non obstantibus præmissis statutis, aut quibuslibet priuilegiis, cuiuscunque tenoris existant. Sanè Religiosis illis, quibus est ab Apostolica Sede, concessum, ut familiaribus suis domesticis, aut pauperibus in Hospitalibus suis degentibus, Sacramenta possint Ecclesiastica ministrare, nullum ex præmissis volumus, quò ad hoc, præiudicium generari.

### *De institutione Iuuentutis.*

**V**T Studia ministerio Ecclesiæ seruiencia neglecta, scilicet Musica, Arithmetica, aliæq; artes liberales postliminio ad Scholas redeant, & Pubes rectè instituantur, Academiæ Cracouien. Professõribz negotium dat Synodus, ut modum docendi in Scholis, per oppida & villas seruandum describant, quem vnà cum hisce Constitutionibus prælo subiici mandabimus. Archidiaconis autem & aliis, quibus visitationis ministerium incumbit, committimus, ut eundem docendi modum obseruari faciant. In quo quidem modo docendi, præcipua ratio habeatur Catechismi in Scholis iuuentuti studio-  
sæ, & in Ecclesiis populo, festis diebus proponendi.

### *De Clericis, secularia negotia apud Seculares tractantibus.*

**Q**uia multi Clericorum Deo militantes, implicant se cu-  

**B**
**ris**



ris secularibus, negotia laicorum gerendo, idcò authoritate præsentis Synodi monentur, vt huiusmodi officia deserant, nec eis se posthac ingerant, sub pœna Cap. Sacerdotibus. & Cap. Sed nec procurationes. Nè Clerici vel Monachi &c. quæ iura disponunt, vt huiusmodi Clerici, Ecclesiæ auxilio & fauore careant, sintq; à ministerio Ecclesiastico alieni.

### *De Quæstore domus Sacerdotum infirmorum.*

**N**E erectæ hætenus Domui infirmorum Sacerdotum subsidia in Synodis decreta negligantur, aut aliis quàm Synodales sanctiones præscribunt, vñbus accommodentur; præsens Synodus prouinciam Quæstoris eiusdem Domus, Reu. D. Iacobo Ianidlouio I.V. Doctori, Ecclesiæ Collegiatæ Sandecen. Canonico, in Academia Cracouien. Professori, demandat. Habebit is Quæstor facultatem exigendi intestata, & obuentiones Domui prædictæ in anterioribus Synodis additas.

### *De vagis Sacerdotibus.*

**S**Ancitas contrà vagos Sacerdotes pœnas in Epistola Pastoralis, per S. Sedem Apostolicam approbata, innouat Synodus; vt nimirum eos nemo ad ministerium Ecclesiæ suæ admittat, sine literis commendatitiis, sub pœna decem marcarum. Scholares quoq; vagi, sine literis commendatitiis vt ad Scholas non admittantur, Parochi sub pœna quinque marcarum prouideant. Sacerdotes autem Regulares cuiuscunq; Ordinis atq; instituti, qui in desolatis vacantibus Ecclesiis, temerè, & sine vlla authoritate, Sacramenta ministrare seu dispensare ausint, pœnam excommunicationis Sedi Apostolicæ reſeruatae, in Clementina. Religiosi. de Priuilegiis &c. suprà inserta, rogatam, incurrere ipso facto, declaramus. Commendas quoq; Ecclesiarum Parochialium, ad formulam



mulam Cap. Nemo. de Electione. in Sexto. in omnibus eius punctis & clausulis, nominatim verò, ut ultra semestris temporis spatium non durent, reducimus.

*De fictis prouisionibus & literis commendatitiis.*

**S**unt qui Presbyteris pro Ecclesiarum suarum ministerio non Segent, & nihilominus prouisiones Ordinandis largiuntur, moresque eorum quos non norunt commendant, aut false eos prædicant: quod nè in posterum fiat, sub poena excommunicationis ipso facto incurrenda, Synodus prohibet.

*De Iudicibus ad iudicia Tribunalitia deputatis.*

**Q**uia lege Regni sancitum est, ut Iudicia Tribunalis, celerius quam hactenus fuit receptum, incipiant; statuit Synodus, ut electio Iudicum Ecclesiasticorum, prima die Mensis Septembris fiat. Cum autem amplius tempus iisdem Iudiciis sit præscriptum, stipendium quoque Iudicum ita ampliandum, Synodus decreuit.

In primis Illustriss. Dominus Episcopus, iisdem Iudicibus, pro sumptu in loco Iudiciorum faciendo, offert centum florenos.

Ultra autem vetera stipendia, Abbates & alij, pendunt.

Abbas Tinecen. olim pendebat ducentos, nunc pendet ducentos viginti quinque.

Abbas Vachocen. olim ducentos, nunc ducentos viginti quinque.

Abbas Andreiouienn. olim centum, nunc centum viginti quinque.

Abbas Sicciehouien. olim centum, nunc centum viginti quinque.

Abbas Coprivnicen. olim centum, nunc centum viginti quinque.

Abbas Claræ Tumbæ, olim centum, nunc centum viginti quinque.

Præpositus Miechouien. olim centum viginti, nunc centum quinquaginta.

Abbas Sanctæ Crucis, olim quinquaginta; nunc sexaginta quinque.

Abbas Chebdouien. olim triginta, nunc quadraginta.

Abbas Sciricen. olim triginta, nunc quadraginta.

Abbas Sandecen. instituto veteri quinque.

Præpositus SS. Corporis Christi Cazimiræ, olim decem, nunc duodecem.

Prouincialis Czeszochouien. olim quindecim nunc decem & octo.

Præpositus Pinczouien. olim decem; nunc duodecem.

Præpositus Bessouien. olim sex, nunc octo.

Præpositus Sancti Spiritus Cracouiæ, olim quinque; nunc octo.

Præpositus in Crasnik, more pristino quatuor.

Præpositus in Trzciana, olim duos, nunc tres.

Præpositus Krzyzanouien. olim duos, nunc tres.

Abbatissa Sandecen. olim sexaginta, nunc octoginta.

Abbatissa Zvierzinecen. olim quadraginta; nunc quinquaginta.

Abbatissa Staniatecen. olim triginta; nunc quadraginta.

Abbatissa Sancti Andreæ, olim triginta, nunc quinquaginta.

Abbatissa Buscen. olim decem; nunc quatuordecem.

Abbatissa Imbramouien. olim decem; nunc duodecem.

Hæc autem auctio stipendii ea conditione decernitur, si Constitutio Comitialis, de Iudiciis diutius faciendis, ad effectum deducatur.

### *De locationibus bonorum Ecclesiæ.*

**L**ocationes bonorum Ecclesiasticorum, ultra triennium,  
sine



sine consensu Locordinarii non fiant : cautiones autem super hisce locationibus, non faciant Clerici coràm Seculari foro, sed tantùm coràm Ecclesiastico, cùm id vergat in diminutionem libertatis Ecclesiasticæ.

*De Seminarij sustentatione.*

**P**RO sustentatione Seminarij, Religiosi Beneficiarij, & Sanctimonialis, ad decursum quadriennij, simplam Contributionem, pro festo Sancti Martini pendant, sub pœna dupli. Venerabile autem Capitulum Ecclesiæ nostræ Cathedralis Crac. super eadem Contributione sese deliberaturum in Capitulo Generali proximè appetenti, recipit.

*De Iudicibus delegandis & Examinatoribus  
Parochorum.*

**D**E propositis à Reuerendis. Domino Episcopo Iudicibus delegandis, & Examinatoribus Parochorum, Synodus sententiæ Reuerendis. Dominat. Suæ subscribit, annuitque, vt Iudicum delegandorum munus sustineant Reueren. Domini Hieronymus Ręczyński Archidiaconus, Ioannes Krasinski Cantor, Albertus Szydlovski Custos, Petrus Górcinius, Ioannes Foxius, Canonici Ecclesiæ Cathedralis Cracouiensis. I. V. Doctores. Ioannes Vielicki Decanus Sendomiriensis. Examinatores autem futurorum Parochorum agant, in Curia Episcopali, Reueren. Domini Ioannes Pisinski Scholasticus, Cancellarius Curie Episcopalis, Petrus Skidzinski Canonicus Cracouiensis. Andreas Zagorny I. V. Doctor, Præpositus Kielcen. Apud Officium Generale, Sebastianus Nucerinus Canonicus Scarbimirien. Adamus Stezicius Præpositus Ecclesiæ Sancti Nicolai, S. Theolog. Iacobus Janidlouius Canonicus Sandecen. I. V. Doctores.

PROMVLGATIO  
BVLLE COENÆ  
DOMINI

PETRVS TYLICKI,  
Dei & Apostolicæ Sedis Gratia  
Episcopus Cracouien.

**R**omanus Pontifex; qui supremi dispensatione consilij, Ecclesia militantis gerit principatum, eos qui potestate sua comprehensi, in cœlis Deum Patrem, & in terris Ecclesiam matrem non agnoscunt, die, quo Christus Iesus salutem nostram consummaturus, Apostolos Sacerdotali charactere insigniuit, ex Ecclesia gremio exterminare cōsuevit; eo instituto, ut cum filio prodigo ad cor reuertantur. Quod Apostolici culminis decretum, ut eis, qui Diœcesi nostra continentur, innotescat, & secundum Prouincialium Synodorum placita euntgetur, nostra huius Diœcesana Synodi Constitutionibus, iuxta suum proprium tenorem, apponimus; publicariq; illud ab iis, ad quos id spectat, mandamus.

LITERÆ



43

# LITERÆ PROCESSVS

S. D. N. PAVLI PP. V.

lectæ die Cœnæ Domini,

Anno M. D. C. XII.

PAVLVS EPISCOPVS

Seruus Seruorum Dei,

ad perpetuam rei memoriam.

**P**Astoralis Romani Pontificis vigilantia, & sollicitudo, cùm in omni Christianæ Reipublicæ pace, & tranquillitate procuranda, pro sui muneris officio assiduè versatur, tum potissimum in Catholicæ fidei, sine qua impossibile est placere Deo, vnitatem, atque integritatem retinenda, & conseruanda, maximè elucet. Nimirum, vt fideles Christi non sint paruuli fluctuantes, neq; circumferantur omni vento doctrinæ in nequitia hominum, ad circumuentionem erroris; sed omnes occurrant in vnitatem fidei, & agnitionis Filij Dei in virum perfectum, neque se in huius vitæ societate & communione lædant, aut inter se alter alteri offensionem præbeat; sed potius in vinculo charitatis coniuncti, tanquam vnius corporis membra sub CHRISTO capite, eiusque in terris Vicario Rom. Pontifice Beatissimi Petri Successore, à quo totius Ecclesiæ vnitatem dimanat, augentur in ædificationem, atq; ita diuina gratia adiutrice, sic præsentis vitæ quiete gaudeant, vt futura quoq; beatitudine perfruantur. Ob quas sanè causas Rom. Pontifices prædecessores nostri, hodierna die, quæ anniuersaria Dominicæ Cœnæ commemoratione solemnis est, spirituales Ecclesiasticæ dilecti.

cæ disciplinæ gladium, & salutaria iustitiæ arma, per ministerium Summi Apostolatus, ad Dei gloriam, & animarum salutem solemniter exercere consueuerunt. Nos igitur, quibus nihil optabilius est, quàm fidei inuiolatâ integritatem, publicam pacem, & iustitiam, Deo auctore, tueri, vetustum & solemnem hunc morem sequentes.

Excomunic.  
& anathematizantur.

1. *Hæretici cuiuscunq; sectæ, eorundem fautores, libros legentes, tenentes, aut imprimantes, & schismatici.*

1. Excommunicamus, & anathematizamus ex parte Dei Omnipotentis, Patris & Filij & Spiritus sancti, auctoritate quoq; Beatorum Apostolorum Petri & Pauli, ac nostra, quoscunq; Hussitas, Wichlephistas, Luteranos, Zuinglianos, Caluinistas, Vgonotos, Anabaptistas, Trinitarios, & à Christiana fide Apostatas, ac omnes & singulos alios Hæreticos, quocunq; nomine censentur, & cuiuscunq; sectæ existant, ac eis credentes, eorumq; receptatores, fautores, & generaliter quoslibet illorum defensores, ac eorundem libros hæresim continentes, vel de Religione tractantes, sine auctoritate nostra & Sedis Apost. scienter legentes, aut retinentes, imprimantes, seu quomodolibet defendentes ex quauis causa, publicè vel occultè, quouis ingenio, vel colore, necnon Schismaticos, & eos, qui se à nostra, & Romani Pontificis pro tempore existentis, obedientia, pertinaciter subtrahunt, vel recedunt.

2. *Appellantes à Pontif. ad futurum Concilium, eorumq; fautores.*

2. Item excommunicamus, & anathematizamus omnes & singulos, cuiuscunq; status, gradus, seu conditionis fuerint; Vniuersitates verò, Collegia, & Capitula quocunq; nomine nuncupentur, interdicimus; ab ordinationibus, seu mandatis nostris, ac Romanorum Pontificum pro tempore existentium, ad vniuersale futurum Concilium appellantes: necnon eos, quorum auxilio, vel fauore, appellatum fuerit.

3. *Pirata, atq; eorum receptatores & fautores.*

3. Item excommunicamus, & anathematizamus omnes Piratas, Cursarios, ac Latrunculos maritimos, discurrentes Mare nostrum, præcipuè à Monte Argentario vsq; ad Terracinam, ac omnes eorum fautores, receptatores, & defensores.

4. Item



4. Item excommunicamus, & anathematizamus omnes & singulos, qui Christianorum quorumcunq; nauibus, tempestate, seu in transuersum ( vt dici solet ) iactatis, vel quomodo naufragium passis, siue in ipsis nauibus, siue ex eisdem eiecta, in mari vel in litore inuenta, cuiuscunque generis bona, tam in nostris Tyrreni, & Adriatici, quàm in cæteris cuiusque maris Regionibus, & litoribus, surripuerint; ita vt nec ob quodcunque priuilegium, consuetudinem, aut longissimi, etiam, immemorabilis, temporis possessionem, seu alium quemcunq; prætextum, excusari possint.

5. Item excommunicamus, & anathematizamus omnes, qui in Terris suis, noua Pedagia seu Gabellas, præterquàm in casibus sibi à iure, seu ex speciali Sedis Apostolicæ licentia, permissis, imponunt vel augent, seu imponi vel augeri prohibita, exigunt.

6. Item excommunicamus & anathematizamus omnes falsarios literarum Apostolicarum, etiam in forma Breuis, ac Supplicationum, gratiam vel iustitiam concernentium, per Romanum Pontificem, vel S. R. E. Vicecancellarios, seu gerentes vices eorum, aut de mandato eiusdem Rom. Pontificis signatarum, necnon falsò fabricantes literas Apostolicas, etiam in forma Breuis, & etiam falsò signantes Supplicationes huiusmodi, sub nomine Romani Pontificis, seu Vicecancellarij, aut gerentium vices prædictorum.

7. Item excommunicamus, & anathematizamus omnes illos, qui ad Saracenos, Turcas, & alios Christiani nominis hostes & inimicos, vel Hæreticos, per nostras, siue huius sanctæ Sedis sententias, expressè vel nominatim declaratos, deferunt seu transmittunt equos, arma, ferrum, filum ferri, stannum, chalybem, omniâq; alia metallorum genera, atque bellica instrumenta, lignamina, canabem, funes, tam ex ipsa canabe, quàm alia quacunq; materia, & ipsam materiam, aliâq; huiusmodi, quibus Christianos, & Catholicos im-

4. Naufragorum Christianorum cuiuscunque generis bona, etiam in litoribus inuenta, surripientes.

5. Imponente noua pedagia & gabellas, vel eas augentes.

6. Falsific. lit. Ap. aut suppl. à quocunq; auct. hēn. te signatas, falsò fabric. Literas Ap.

7. Deferente arma & alia v. sui bellico idonea ad Turcas vel alios Christiani nominis inimicos, & ad Reip. Christianæ statum pertinentia ipsdem in dānum Christianorum nuntian.

pugnant, necnon illos, qui per se vel alios, de rebus statum Christianæ Reipub. concernentibus, in Christianorum perniciem & damnum, ipsos Turcas, & Christianæ Religionis inimicos, necnon hæreticos, in damnum Catholicæ Religionis, certiores faciunt, illisq; ad id auxilium, consilium, vel fauorem quomodolibet præstant. Non obstantibus quibuscunq; privilegijs, quibuscunq; personis, Principibus, Rebus publicis, per Nos & Sedē prædictā hactenus concessis, de huiusmodi prohibitione expressam mentionem non facientibus.

1. Impedien. eos  
qui victualia, &  
alia necessaria  
Romam conue-  
hant.

8. Item excommunicamus, & anathematizamus omnes impediētes, seu inuadentes eos, qui victualia, seu alia ad vsum Rom. Curie necessaria adducunt, ac etiam eos, qui ne ad Rom. Curiam adducantur vel afferantur, prohibent, impediunt, seu perturbant, seu hæc facientes defendunt per se vel alios, cuiuscunq; fuerint ordinis, præeminentiæ, conditionis & status, etiam si Pontificali, seu Regali, aut alia quauis, Ecclesiastica vel mundana, præfulgeant dignitate.

6. Ad Sedem Ap.  
venien. vel ab ea  
receden. sua, aut  
aliorum opera  
ledentes, & si  
ne iurisdictione  
vexan. in Curia  
commoran.

9. Item excommunicamus, & anathematizamus omnes illos, qui ad Sedem Apostolicam venientes, & recedentes ab eadem, sua vel aliorum opera interficiunt, mutilant, spoliānt, capiunt, detinent, necnon illos omnes, qui iurisdictionem ordinariam, vel delegatam à Nobis vel Nostreis Iudicibus, non habentes, illam sibi temerè vendicantes, similia, contra morantes in eadem Curia, audent perpetrare.

10. Romipetas, ac  
peregr. etiam in  
Urbe morantes,  
vel abeuntes le-  
dentes.

10. Item excommunicamus, & anathematizamus omnes interficientes, mutilantes, vulnerantes, detinentes, capientes, seu deprædantes Romipetas seu Peregrinos, ad Urbem causa deuotionis seu peregrinationis accedentes, & in ea morantes, vel ab ipsa recedentes, & in his dantes auxilium, consilium, vel fauorem.

1. Offendentes  
S. R. E. Card. &  
alios Prælatos.

11. Item excommunicamus, & anathematizamus omnes interficientes, mutilantes, vulnerantes, percutientes, capientes, carcerantes, detinentes, vel hostiliter insequentes S. R. E. Cardina-



Cardinales, ac Patriarchas, Archiepiscopos, Episcopos, Sedisq; Apostolicæ Legatos, vel Nuntios, aut eos à suis Diocesis, Territoriis, Terris, seu Dominiis eiicientes; necnon ea mandantes, vel rata habentes, seu præstantes in eis auxilium, consilium, vel fauorem.

12. Item excommunicamus, & anathematizamus omnes illos, qui per se vel per alios, personas Ecclesiasticas quacunq; vel seculares, ad Romanam Curiam super eorum causis & negotijs recurrentes, ac illa in eâdem Curia prosequentes, aut procurantes, negotiorumq; gestores, aduocatos, procuratores, & agentes, seu etiam Auditores, vel Iudices super dictis causis vel negotijs deputatos, occasione causarum vel negotiorum huiusmodi, occidunt, seu quoquomodo percutiunt, bonis spoliunt, seu qui per se vel per alios, directè vel indirectè, delicta huiusmodi committere, exequi, vel procurare, aut in eisdem auxilium, consilium, vel fauorem præstare non verentur, cuiuscunq; præeminentiæ & dignitatis fuerint.

12. Ad Rom. Cur. pro negotiis suis recurrentes. per se vel per alios liden.

13. Item excommunicamus, & anathematizamus omnes tam Ecclesiasticos, quàm seculares cuiuscunq; dignitatis, qui pratexentes friuolam quandâ appellationem à grauamine, vel futura executione literarum Apostolicarum, etiam in forma Breuis, tam gratiâ quàm iustitiam concernentium, necnon citationum, inhibitionum, sequestrorum, monitoriorum, processuum, executorialium, & aliorum decretorum, à Nobis & à Sede prædicta, seu Legatis, Nuntiis, Præsidentibus Palatii nostri, & Camere Apostol. Auditoribus, Commissariis, alijsq; Iudicibus, & Delegatis Apostolicis emanatorum, & quæ pro tempore emanauerint, aut aliàs, ad Curias seculares, & laicam potestatem recurrunt, & ab ea, instante etiam Fisci Procuratore, vel Aduocato, appellationes huiusmodi admitte, ac literas, citationes, inhibitiones, sequestra, monitoria, & alia prædicta, capi, & retineri faciunt, quicquid illa simpliciter, vel

13. Appellantes à grauamine, vel futura executione literarum Apostolicarum. ad laicam potestatem.

sine eorum beneplacito & consensu, vel examine executioni demandari, aut nè Tabelliones, & Notarij, super huiusmodi literarum & processuum executione, instrumenta vel acta conficere, aut confecta, parti cuius interest, tradere debeant, impediunt, vel prohibent, ac etiam partes, seu earum agentes, consanguineos, affines, familiares, notarios, executores, & subexecutores literarum, citationum, monitoriorum, & aliorum prædictorum capiunt, percutiunt, vulnerant, carcerant, derinent, ex Ciuitatibus, Locis, & Regnis eiiciunt, bonis spoliunt, perterrefaciunt, concutiunt, & comminantur per se vel alium seu alios, publicè, vel occultè, quicquid aliàs quibuscunq; personis, in genere vel in specie, nè pro quibusvis eorum negotijs prosequendis, seu gratijs vel literis impetrandis ad Rom. Cur. accedant, aut recursum habeant, seu gratias ipsas, vel literas à dicta Sede impetrent, seu impetratis utantur, directè vel indirectè prohibere, statuere, seu mandare, vel eas apud se, aut Notarios seu Tabelliones, vel aliàs quomodolibet retinere, præsumunt.

Executionē  
literarū Apost.  
ut aliarum ex-  
emptionum im-  
pedientes, & pro  
hibentes ad gra-  
tias impetran-  
tes acceden.

14. Item excommunicamus, & anathematizamus omnes & singulos, qui per se vel alios, auctoritate propria ac de facto, quarumcunq; exemptionum, vel aliarum gratiarum, & literarum Apostolicarum prætextu, beneficiales, & decimarum, ac alias causas spirituales, & spiritualibus annexas, ab Auditoribus, & Commissarijs nostris, alijsq; Iudicibus Ecclesiasticis auocant, illarumque cursum, & audientiam, ac personas, Capitula, Conuentus, Collegia, causas ipsas prosequi volentes impediunt, ac se de illarum cognitione tanquam Iudices interponunt: quicquid partes actrices, quæ illas committi fecerunt, & faciunt, ad reuocandum, & reuocari faciendum citationes, vel inhibitiones, aut alias literas in eis decretas, & ad faciendum, vel consentiendum eos, contra quos tales inhibitiones emanarunt, à censuris, & pœnis in illis contentis absolui, per statutum, vel aliàs, compellunt, vel exe-



vel executionem literarum Apostolicarum, seu executorialium, processuum, ac decretorum prædictorum, quomodolibet impediunt, vel suum ad id fauorem, consilium, aut assensum præstant, etiam prætextu violentiæ prohibendæ, vel aliarum prætensionum, seu etiam donec ipsi, ad Nos informandos vt dicunt, supplicauerint, aut supplicari fecerint, nisi supplicationes huiusmodi, corâm Nobis & Sede Apostolica, legitimè prosequantur, etiam si talia committentes, fuerint Præsidentes Cancelliarum, Consiliorum, Parlamentorum, Cancellarij, Vicecancellarij, Consiliarij ordinarij vel extraordinarij, quorumcunq; Principum secularium, etiam si Imperiali, Regali, Ducali, vel alia quacunq; præfulgeant dignitate, aut Archiepiscopi, Episcopi, Abbates, Commendatarij, seu Vicarij fuerint.

15. Quiue ex eorum prætenso officio, vel ad instantiam partis, aut aliorum quorumcunq; personas Ecclesiasticas, Capitula, Conuentus, Collegia Ecclesiarum quarumcunq; corâm se ad suum tribunal, Audientiam, Cancellariam, Consilium, vel Parlamentum, præter Iuris Canonici dispositionem trahunt, vel trahi faciunt, vel procurant directè vel indirectè, quouis quæsito colore: nec non qui statuta, ordinationes, constitutiones, pragmaticas, seu quæuis alia decreta, in genere vel in specie, ex quauis causa, & quouis quæsito colore, ac etiam prætextu cuiusvis consuetudinis, aut priuilegij, vel aliàs quomodolibet fecerint, ordinauerint, & publicauerint, vel factis & ordinatis vsi fuerint, vnde libertas Ecclesiastica tollitur, seu in aliquo læditur, vel deprimitur, aut aliàs quouis modo restringitur, seu Nostri & dictæ Sedis, ac quarumcunq; Ecclesiarum iuribus, quomodolibet, directè vel indirectè, tacitè vel expressè, præiudicatur.

16. Necnon qui Archiepiscopos, Episcopos, aliosq; superiores & inferiores Prælatos, & omnes alios quoscunq; Iudices Ecclesiasticos ordinarios, quomodolibet hac de causa,

15. Iudices seculares, qui ecclesiasti. personam trahunt ad suum Tribunalia, quæ Ecclesiasti. libertatem tollunt aut in aliquo perturbant.

16. Imped. Prælatos, & alios iurisd. videntur, qui illorum, & de

iudicia elu-  
tes, ad cur.  
ul. recur. aut  
tra illos de-  
nūt, præstan-  
t<sub>3</sub> auxilium.

directè vel indirectè, carcerando, vel molestando eorum a-  
gentes, procuratores, familiares, necnon consanguineos, &  
affines, aut aliàs impediunt, quò minùs sua iurisdictione Ec-  
clesiastica, contra quoscunque vtantur, secundùm quod Ca-  
nones, & sacræ Constitutiones Ecclesiasticæ, & decreta Con-  
ciliorum generalium, & præsertim Tridentini, statuunt: ac  
etiam eos, qui post ipsorum Ordinariorum, vel etiam ab eis  
delegatorum quorumcunq; sententias & decreta, aut aliàs  
fori Ecclesiastici iudicium eludentes, ad Cancellarias, & alias  
Curias seculares recurrunt, & ab illis prohibitiones & man-  
data, etiam poenalia, Ordinarijs, aut delegatis prædictis de-  
cerni, & contra illos exequi procurant; eos quoq; qui hæc de-  
cernunt, & exequuntur, seu dant auxilium, consilium, patro-  
cinium, & fauorem in eisdem.

Vsurpantes  
des Apost. &  
erituncq; Ec-  
clesiasticas  
s. iurisdictioni-  
s, vel etiam  
filijs seque-  
stantes.

17. Quicquid iurisdictiones, seu fructus, redditus, & prouen-  
tus, ad Nos & Sedem Apostolicam, & quascunq; Ecclesiasti-  
cas personas, ratione Ecclesiarum, Monasteriorum, & ali-  
orum beneficiorum Ecclesiasticorum pertinentes, vsurpant,  
vel etiam quauis occasione, vel causa, sine Romani Pontifi-  
cis, vel aliorum ad id legitimam facultatem habentium, ex-  
pressa licentia, sequestrant.

Imponentes  
decimas, & alia  
era personis  
Ecclesiasticis, Eccle-  
siis, Monasteriis,  
ut eorum fru-  
ctibus.

18. Quicquid collectas, decimas, taillas, præstantias, & alia o-  
nera clericis, Prælati, & alijs personis Ecclesiasticis, ac eorū,  
& Ecclesiarum, Monasteriorum, & aliorum beneficiorum  
Ecclesiasticorum bonis, illorumque fructibus, redditibus, &  
prouentibus huiusmodi, absq; simili Rom. Pont. speciali &  
expressa licentia, imponunt, & diuersis etiam exquisitis mo-  
dis exigunt, aut sic imposita, etiam à spontè dantibus & con-  
cedentibus, recipiunt, necnon qui per se vel alios, directè  
vel indirectè, prædicta facere, exequi, vel procurare, aut in  
eisdem auxilium, consilium, vel fauorem præstare non ve-  
rentur, cuiuscunq; sint præeminentiæ, dignitatis, ordinis,  
conditionis, aut status, etiam si Imperiali, aut Regali præful-  
geant.



geant dignitate, seu Principes, Duces, Comites, Barones, & alij Potentatus quicunq; etiam Regnis, Prouincijs, Ciuitatibus, & Terris quoquomodo Præsidentes, Consiliarij, & Senatores, aut quauis etiam Pontificali dignitate insigniti. Innuantes decreta super his, per sacros Canones, tam in Lateranensi nouissimè celebrato, quàm alijs Concilijs generalibus edita, etiam cum censuris, & pœnis in eis contentis.

19. Item excommunicamus, & anathematizamus omnes & quoscunq; Magi, Prælati, & Iudices, Notarios, Scribas, Executores, Subexecutores quomodolibet se interponentes in causis capitalibus, seu criminalibus, contra personas Ecclesiasticas, illas processando, banniendo, capiendo, seu sententias contra illas proferendo, vel exequendo, sine speciali, specifica, & expressa huius Sanctæ Sedis Apostolicæ licentia, quicq; eiusmodi licentiam, ad personas & casus non expressos extendunt, vel aliàs illa perperam abutuntur, etiam si talia committentes fuerint Consiliarij, Senatores, Præsidentes, Cancellarij, Vicecancellarij, aut quouis alio nomine nuncupati.

19. Iudices seculares, qui se interponunt in causis capitalibus seu criminalibus contra Ecclesiasticas personas.

20. Item excommunicamus, & anathematizamus omnes illos, qui per se seu alios, directè vel indirectè, sub quocunq; titulo vel colore inuadere, destruere, occupare, & detinere præsumperint, in totum vel in partem, Almam Urbem, Regnum Siciliæ, Insulas Sardinia & Corsicæ, Terras citrà Pharam, Patrimonium Beati Petri in Thuscia, Ducatum Spoletanum, Comitatum Venaylinum, Sabineum, Marchia Anconitanæ, Massæ Trebaria, Romandiola, Campaniæ, & maritimas Prouincias, illarumq; Terras, & loca, ac Terras specialis commissionis Arnulforum, Ciuitatesq; nostras Bononiam, Cæsenam, Ariminum, Beneuentum, Perusium, Auinionem, Ciuitatem Castelli, Tudertum, Ferrariam, Comaculum, & alias Ciuitates, Terras, & loca, vel iura ad ipsam Romanam Ecclesiam pertinentia, dictaq; Rom. Ecclesiæ, medi-

20. Occupant bona, aut terræ Ecclesiæ Romanæ, & illius jurisdictionem usurpantes.

tè vel

tè vel immediatè subiecta, necnon supremam iurisdictionem in illis, Nobis & eidem Romanæ Ecclesiæ competentem, de facto vsurpare, perturbare, retinere, & vexare varijs modis præsumunt, necnon adhærentes, fautores, & defensores eorum, seu illis auxilium, consilium, vel fauorem quomodolibet præstantes.

Volentes præsentibus nostros processus, ac omnia & quæcunq; his literis contenta, quouq; alij huiusmodi processus, à Nobis, aut Romano Pontifice pro tempore existente fiant, aut publicentur, durare, suosq; effectus omninò sortiri.

*Absolutio soli  
Pontifici refer-  
atur.*

*Absolvere præ-  
sentes ex-  
communicantur.*

Cæterùm à prædictis sententijs, nullus per aliū quàm per Romanum Pontificem, nisi in mortis articulo constitutus, nec etiam tunc, nisi, de stando Ecclesiæ mandatis & satisfaciendo, cautione præstita, absolui possit, etiam prætextu quarumvis facultatum, & indultorum quibuscunq; personis Ecclesiasticis, secularibus, & quorumvis Ordinum, etiam Mendicantium, ac Militiarum regularibus, etiam Episcopali, vel alia maiori dignitate præditis, ipsiq; Ordinibus, & eorum Monasterijs, Conuentibus, & Domibus, ac Capitulis, Collegijs, Confraternitatibus, Congregationibus, Hospitalibus, & locis pijs, necnon laicis, etiam Imperiali, Regali, & alia mundana excellentia fulgentibus, per Nos & dictam Sedem, accuiusvis Concilij decreta, verbo, literis, aut alia quacunq; scriptura, in genere & in specie concessorum, & innouatorum, ac concedendorum, & innouandorum.

Quòd si fortè aliqui contrà tenorem præsentium, talibus excommunicatione & anathemate laqueatis, vel eorum allicui, absolutionis beneficium impendere de facto, præsumpserint, eos excommunicationis sententia innodamus, grauius contra eos, spiritualiter & temporaliter, prout expedire nouerimus, processuri.

*Pape absolutio  
non comprehen-*

Declarantes, ac protestantes, quamcunq; absolutionem, etiam solemniter per Nos faciendam, prædictos excommunicatos



municatos sub præsentibus comprehensos, nisi priùs à præmissis, cum vero proposito vltèriùs similia non committendi, destiterint, ac quò ad eos, qui contrà Ecclesiasticà libertatem, vt præmittitur, statuta fecerint, nisi priùs statuta, ordinationes, constitutiones, pragmaticas, & decreta huiusmodi, publicè reuocauerint, & ex Archiuijs, seu capitularibus locis, aut libris, in quibus annotata reperiuntur, deleri & casari, ac Nos de reuocatione huiusmodi certiores, fecerint, eos non comprehendere, nec eis aliter suffragari: quin etiam per huiusmodi ab solutionem, aut quoscunq; alios actus contrarios, tacitos vel expressos, ac etiam per patientiam & tolerantiam nostram, vel Successorum nostrorum; quantumcunq; tempore continuatam, in præmissis omnibus & singulis, ac quibuscunq; iuribus Sedis Apostolicæ, ac S. R. E. vndecunq; & quandocunq; quæsitis, vel quærendis, nullatenus præiudicari posse, aut debere.

Non obstantibus priuilegijs, indulgentijs, indultis, & literis Apostolicis, generalibus vel specialibus, supradictis vel eorum alicui, seu aliquibus alijs cuiuscunq; ordinis, status, vel conditionis, dignitatis, & præminentiae fuerint, etiam si, vt præmittitur, Pontificali, Imperiali, Regali, seu quauis Ecclesiastica, & mundana præfulgeant dignitate, vel eorum Regnis, Prouincijs, Ciuitatibus, seu locis à prædicta Sede, ex quauis causa, etiam per viam contractus, aut remunerationis, & sub quauis alia forma, & tenore, ac cum quibusuis clausulis, etiam derogatorijs, concessis, etiam continentibus quòd excommunicari, anathematizari, vel interdicti non possint, per literas Apostolicas, non facientes plenam & expressam, ac de verbo ad verbum, de priuilegijs, indulgentijs, & indultis huiusmodi, ac de ordinibus, locis, nominibus proprijs, cognominibus, & dignitatibus eorum, mentionem, necnon consuetudinibus, etiam immemorabilibus, ac præscriptionibus quantumcunq; longissimis,

dic eos, qui  
præmissis non  
destiterint.

gissimis, & alijs quibuslibet obseruantijs, scriptis, vel non scriptis, per quæ contrà hos nostros processus, ac sententias, quominus includantur in eis, se iuuare valeant, vel tueri. (quæ omnia, quò ad hoc, eorum omnium tenores, ac si de verbo ad verbum, nihil penitus omissio, intererentur præsentibus, pro expressis habentes, penitus tollimus, & omnino reuocamus) cæterisq; contrarijs quibuscunque.

Vt verò præsentibus nostri processus, ad publicam omnium notitiam facilius deducantur, chartas seu membranas processibus ipsos continentes, valuis Ecclesiæ S. Ioannis Lateran. & Basilicæ Principis Apostol. de Vrbe, appendi faciemus, vt ij, quos processus huiusmodi concernunt, quò ad ipsos non peruenerint, aut quò ipsos ignorauerint, nullam possint excusationem prætere, aut ignorantiam allegare, cum non sit verisimile, id remanere incognitum, quod tam patenter omnibus publicatur. Insuper, vt processus ipsi, & præsentibus literæ, ac omnia & singula in eis contenta, eò fiant notiora, quò in plerisq; Ciuitatibus, & locis fuerint publicata, vniuersis & singulis Patriarchis, Primatibus, Archiepiscopis, Episcopis, & locorum Ordinarijs, & Prælati vbiuslibet constitutis, per hæc scripta committimus, & in virtute sanctæ obedientiæ, districtè præcipiendo mandamus, vt per se vel alium seu alios, præsentibus literas, postquam eas receperint, seu earum habuerint notitiam, semel in anno, aut si expedire viderint, etiam pluries, in Ecclesijs suis, dum in eis maior populi multitudo ad diuina conuenerit, solemni er publicent, & ad Christi fidelium mentes reducant, nuntient, & declarent.

*quicunque, audi-  
re confessiones,  
ind se has lre-  
as habiant.*

Cæterum Patriarchæ, Archiepiscopi, Episcopi, alijsq; locorum Ordinarijs, & Ecclesiarum Prælati, necnon Rectores, cæteri q; curam animarum exercentes, ac presbyte i secularibus, & quorumuis Ordinum regulares, ad audiendas peccatorum confessiones, quauis auctoritate deputati, transum-  
prum



præsentium Literarum penes se habeant, easque diligenter legere, & percipere studeant. Volentes earundem præsentium transumptis, etiam impressis, Notarij publici manu subscriptis, & sigillo Iudicis ordinarij Romanæ Curia, vel alterius personæ, in dignitate Ecclesiastica constitutæ munitis, eandem prorsus fidem, in iudicio & extrâ illud, ubiq; locorum adhibendam fore, quæ ipsis præsentibus adhiberetur, si essent exhibitæ vel ostensæ. Nulli ergo omnino hominum, liceat hanc paginam nostræ excommunicationis, anathematizationis, interdicti, innouationis, innouationis, declarationis, protestationis, sublationis, reuocationis, commissionis, mandati, & voluntatis infringere, vel ei ausu temerario contraire. Si quis autem hoc attentare præsumpserit, indignationem Omnipotentis Dei, ac Beatorum Petri & Pauli Apostolorum eius, se nouerit incursum. Dat. Romæ apud Sanctum Petrum, Anno Incarnationis Dominicæ Millesimo sexcentesimo duodecimo, tertio decimo Calendas Maij. Pontificatus Nostri Anno Seprimo.

Scipio Cobellutius.

M. Datarius.

Registrata apud Scipionē Secretariū. *S. de Vrsinis*

Anno à Natiuitate D. N. Iesu Christi 1612. Indictione 10. die vero 19. mensis Aprilis, Pontif. Sanctiss. in Christo Patris, & D. N. D. Pauli diuina prouidentia Papæ V. anno septimo, supradictæ literæ Apostolicæ affixæ, & publicatæ fuerunt ad Valuas Basilicarum S. Ioannis Lateranæ, & Principis Apostolorum, & in acie Campi Floræ, per nos Paulum Bartoccium, & Io. Dominicum de Pace Curiores.

Christophorus Fund. Mag. Curs.

D 2 . . . loco t plumbi.

MODVS  
INSTITVENDÆ IYVENTVTIS  
ex decreto Synodi  
ab Academia Cracouien. præscriptus.

**C**UM animaduerneret Synodus nuper Cracouia habitata, veterem illam & rectam rationem docendi in Scholis collabi, & quasdam artes, non sine incommodo Ecclesiæ Dei, conticescere: voluit, vt certa aliqua formula instituendæ Iuuentutis, obseruanda ab omnibus Præfectis Scholarum Parochialium in hac Diœcesi, auctoritate sua ederetur. Quò itaq; studio & intentioni Synodi plenè satisfiat, tria hæc, perpetuo vinculo inter se sociata esse oportet, nempe Pietatem, Gubernationem, & Modum docendi.

Ac pietas quidem primùm, ex qua propriè cultus Dei, & aliæ virtutes prodeunt, instillanda est teneris animis, partim informando eos doctrina Christiana, partim excitando ad virtutem frequentibus monitis, quorum ansa ex cursu lectionum sumatur.

Vt verò hæc ipsa assiduæ exhortationis seges, crescat cum ætate in adolescentulis foelicius, radicesq; in eis agat firmiores; omne principium studiorum, ab inuocatione diuini numinis auspicari: Sacrum Missæ officium audire frequenter, festis autem diebus, etiam cantare, vnà cum Vesperis: Concionibus Ecclesiasticis interesse, & audita in illis referre: Poenitentia & Eucharistiæ Sacramenta vsurpare sæpius: surgentes à somno, & euntes cubitum orare: facereque conscientia examen quotidie, consuefiant.

Fide autem



Fide autem inprimis & religione Catholica, imbuantur sedulò. cuius rei fructus, vt & ad alios rudiores ex plebe redundet, ediscât memoriter Catechismum Polonicum Cardinalis Bellarmini, vel Ledesmæ, eundemq; diebus Dominicis & festis, pomeridiano tempore, in Ecclesia & frequentia populi, clara voce, alternis interrogationibus, recitent.

Et quoniam patent magis, ac incitant fortius ea, quæ oculis, quàm quæ auribus in animos influunt, Iuuentusq; in vitam & mores Magistri, tanquam in speculum, inspiciens, ex eo plerumq; normam & exempla viuendi desumit; prouidendum est summopere, vt is non modò doctus, sed etiam fide Catholicus, moribusq; integerrimus deligatur. Vnde & priusquàm munus suum Scholasticum, Magister, Baccalaureus, vel alius quiuis Rector Scholæ ineat, professionem fidei solemnem, à Bulla Pij IV. Pontificis Maximi præscriptam, coràm Prælato Ecclesiæ, vel eius Vicario, iuxtâ decreta Concilii Tridentini, faciet, bibliothecaq; eius excutietur diligenter, nè aliqua venena Hæreseos, aut cuiuspiam prauitatis, clanculùm lateant.

Gubernatio porrò siue regimen Scholasticū, sic instituitur.

Inprimis Iuuentus, veteri & vsitato Scholarum more, in certos ordines distinguatur, per quos ingenio, diligentia, doctrinæ, ascensus sensim pateat.

Singulis deinde ordinibus, lectiones accommodatæ illorum ingeniis & capui, prælegantur: nec in legendo sit affectata difficultas, & ostentatio ingenii; sed discipulorum profectui consulatur.

In explicandis Authoribus, Accentus pronuntiationis, diligens habeatur ratio, eademq; à discipulis seuerè exigatur. cui vt faciliùs assuescant, dictionum syllabæ, quæ in dicendo eleuantur, virgula præfixa notabuntur.

Linguae Latinae exercitium, sermone & stylo quotidiano excolatur. Styli soluti materia sit, elegans narratiuncula, aut similitudo, aut apophthegma, aut fabula Aesopi, aut dictum vel factum memorabile, ex historia desumptum. Ligati verò, carmen suis numeris solutum, aut thema propositum.

Circà emendationem styli, prius proprietati in dicendo, quàm ornamētis studeatur, ut quoduis proprio nomine enuntiare discant: deinde vitia Orthographiae corrigantur.

Auscultata, & memoriae mandata per totam septimanam, diebus Sabbathi referent, & ex his disputationem ingredientur.

Scholae disciplina erit non fustuaria, nec immanibus virgis vtens, sed moderata, & delictis accommodata. Plurimis enim haec asperitas causa fuit, ut odium in literas, à prima aetate conceptum, semper retinuerint.

Modus denique & ratio docendi, ex probatissimis Authoribus & Interpretibus desumatur; nec quisquam, contra decreta Concilii Tridentini, audeat eos attingere, qui aliquam Haereseos vel impuritatis labem aspersam habent, unde sibi & aliis perniciem accersere possint. Vtantur verò omnes, infra scriptis.

Grammatica Latina Cornelii Ultraiectini, quae miram breuitatem cum pari facilitate coniunctam habet. Eius Rudimenta rudes, maior verò Etymologia & Syntaxis prouectiores, institutionibus Grammaticis erudient. Prosodiae incrementa, in Declinationibus maioris Etymologiae reperies. Inter interpretandum, suffecerit sensum Regulae indicare, & exemplis illustrare, nec illius facilitas, aliunde petitis praeceptis obruenda, cum haec usu & scriptione, facilius & foelicius cognoscantur.

Graecae quoque Grammaticae Clenardi, sit studium diligens, cum



gens, cùm in libris Græcorum omnis elegans doctrina continetur, & Iuuentus sit Seminarium diuersorum Ordinum. Huic diebus Dominicis, Euangelia Græca, festis, Gregorii Nazianzeni Epistolæ, profestis, Fabulæ Ælopi, Apophthegmata Plutarchi, Sententiæ & Adagia Græca adiungantur.

Ex Oratoribus M. Cicero assumendus, in cuius Epistolis ad Familiares, tenuius dicendi genus, in libris de Officiis, Amicitia, Senectute, aquabile & temperatum, in Orationibus grauius ac sublimius, continetur. Ab Epistolis exordium fiet, præsertim à libris ij. iij. jv. Primus enim negotia Senatus describit. Interpretatio artificium, modos dicendi, sententias, indicabit.

Oratoribus cùm sint affines Poëtæ, ex his primò legantur libri Ouidij Tristium, & de Ponto, in quibus natiua dicendi puritas reluet: demùm ad opera Virgilij procedatur, qui in Bucolicis infimum dicendi genus Poëticum, in Georgicis mediocre, in Æneide supremum expressit. Sanazarius quoque de Partu Virginis prælegendus, eo tempore, quo hoc mysterium ab Ecclesia recolitur. In quorum explicati-  
one, obscœna, lasciua, reijciantur, & Poëtici lepôres ac varia descriptiones, etiam ex aliis collectæ, proponantur.

Historia, que vitam humanam format, ex Iustino primùm cognoscatur, qui origines Rerum publicarũ ab initio mundi exorditur. Huic Florus, qui Romanam Liuij in compendium redegit, succedat. Nec Curtius, propter miram in sermone facilitatem & copiam, & in narrationibus lepôrem, negligendus est. Prouectioribus Salustii historia adijci poterit. Et nè domestica neglecta iaceant, Ianicius qui Polonorum res gestas canit, & Herburti historia, alicui ex superioribus adiungantur. Ex qua lectione, exempla, dicta sapienter, facta memorabilia, referantur in libros custodes memoria.

Catechi.

Catechismus Græcolatinus Canisii, ex quo sugant par-  
uuli rationabile lac Apostolicæ doctrinæ, proponatur nau-  
ter. Similiter & Computi Ecclesiastici recogniti tractatio,  
cùm festorum & aliorum temporum vicissitudinem, Eccle-  
siæ inprimis necessariam, nosse doceat. Musices quoque stu-  
dium hætenùs neglectum, & ab Ecclesia sèmp̃er desidera-  
tum, sit in posterùm & diligens & feruens. Demùm Arith-  
metica, cùm sit Mathematicis studiis & vitæ rationibus ac-  
commodata, doceatur.

*Prædictarum lectionum hic erit ordo.*

*Matutino tempore.*

- |      |   |      |   |
|------|---|------|---|
| Hora | { | I.   | Examen memoriæ ex Grammatica, Cicero-<br>ne, Computo, vel Musica. |
|      |   | II.  | Grammaticæ interpretatio.   |
|      |   | III. | Ciceronis.  |
|      |   | IV.  | Computi & Musicæ, alternis diebus.                                |

*Post meridiem.*

- |      |   |      |   |
|------|---|------|---|
| Hora | { | I.   | Examen memoriæ ex Græcis, & Poëtis.                             |
|      |   | II.  | Græca præcepta, cum Fabula, aut Apophte-<br>gmatibus Plutarchi. |
|      |   | III. | Poëta.  |
|      |   | IV.  | Historicus explicabitur.  |

Post cuiuslibet autem lectionis interpretationem, sit exa-  
men aut disputatio. Sabbatho, post examen generale le-  
ctionum, sit exercitium Accentus, in pronuntiandis lectio-  
nibus, ex Cicerone & Poëtis recitatis. Postea Catechismus  
& Arithmetica tradantur. Diebus Dominicis & festis, Euan-  
gelia Græ-



gelia Græca, aut Gregorii Nazianzeni Epistolæ. Catechismus quoq; Polonicus in Ecclesia recitetur.

Cùm verò, vt testis est D. Hieronymus, lectio sine stylo vel calamo, somnus sit, habeantur à Puë libri chartacei, in quorum vnum argumenta, artificia: in alterum sententias, diuina acutè, exempla: in tertium copiam dicendi: in quartum elegantias Poëticas, descriptiones Locorum, vt Montium, Vrbium, Portuum &c. Temporum, vt aurora, crepusculi, noctis, diei; Personarum, vt militis, agricolæ; Animalium, vt equi, leonis &c. referant. disponantq; hæc Cœlestanea, per diuersos titulos, & suo ordine singula notent; vt postea inde, tanquam ex penu, depromant, quibus dictionem, tam solutam quam ligatam, locupletare possint.

*Tyrunculi sic instituentur.*

*Matutino tempore.*

- Hora { I. Figuras literarum nosse, coniungere, apto sono  
& accentu debito pronuntiare, discant.  
II. Doctrinam Christianam.

*Post Meridiem.*

- Hora { I. Breues erunt & selectiores sententiæ, quæ sint  
pietatis & honestatis symbola.  
II. Ministerium Missæ.

*In his si fuerint exercitati.*

*Manè.*

- Hora { I. Inflexiones tam Nominum quam Verborum  
discant.  
II. Disticha Catonis, aut Michaëlis Verini, aut Sententias P. Syri Mimi.

E

*Pomeridie*

*Pomeridiano tempore.*

Hora { I. Dictionarium Latinopolonicum.  
 II. Epistolarum Ciceronis librum xv. ad Famili-  
 liares.

Diebus verò singulis, hora matutina, exercitium in literis  
 Latinis eleganter & orthographice pingendis, exhibe-  
 bunt, disputationemque ex verborum copia & inflexi-  
 onibus facient. Sabbatho numerum Arithmeticum,  
 & Cifioianus discent.


—



BIBLIOTHECA  
 UNIVERSITATIS  
 CRACOVIAE



eris  
ibe.  
xi.





Biblioteka Jagiellońska



stdr0024534

